

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 1/2011-mik, ataani allassimatut oqaasertalimmik, Inatsisartut tapersiinnaannik Inatsisartut aalajangiiffigisassaattut siunnersuut:

Nunat Avannarliit Killiit Siunnersuisoqatigiiffiata Islandimi, Savalimmiuni Kalaallilu Nunaanni naalakkersuisut kaammattorpai ukiuni qulilinni kingullerni avatangiisitigut silallu pissusiisigut allannguutit malitsigisaasa nunarsuup immikkoortuanut maanga nunallu tamalaat akornanni suleqatigiinnermut sunniutigisimasaat eqqarsaatigalugit nunani pineqartuni pingasuni ataatsimut soqutigisat nalunaarsorneqarnissaannut iliuseqaqqullugit. Nunani pineqartuni nunanut allanut naalakkersuisut naalakkersuinermik sulialinnik suliassaqarfimmilu immikkut ilisimasallit siuttuinik peqataaffigineqartumik ataatsimeersuartitsinerat aallaaviusinnaavoq, tassani pineqartoq eqqarsaatigalugu ataatsimut naalakkersuinikkut ingerlatseriaasissamut missingiut oqallisigineqarlunilu suliarineqarsinnaassalluni.

(Aallartitat siulittaasuat Josef Motzfeldt)

Akissuteqaat

(Naalakkersuisut Siulittaasuat aamma Nunanut Allanut Tunngasunut Naalakkersuisoq)

Siullermeerneqarnera

Inassuteqaat siunnersuutiginik marlunnik imaqarpoq. Siullermik Nunat Avannarliit Killiit avatangiisitigut silallu pissusiisigut allannguutit kingunerisaannik ataatsimut soqutigisanik qulaajaanissaat. Tamatuma saniatigut nunanut allanut ministereqarfiup aqqissuussaanik ataatsimeersuarnissamik aqqissuussinissaq siunnersuutigineqarpoq, tassanilu ataatsimut avatangiisinut silallu pissusianut tunngasunik politikkissaq pillugu soqutiginnineq suliarinninnissamullu periarfissat suunersut politikerinit immikkullu ilisimasalinnit paasinianeqaassapput.

Naalakkersuisut Nunani Avannarlerni Killerni Siunnersuisoqatigiit silap pissusiata allanngornerata kingunerisaanik nunarsuup immikkoortuani maani nunatsinni unammilligassatsinnut soqutiginninnerat pingaartippaat.

Naalakkersuisut inassutigaat siunnersuutip isikkumisut isikkoqarluni Inatsisartunit akuersissutigineqarnissaa, nunanilu pineqartuni naalakkersuisut namminneerlutik suleqatigiissutissavittut periarfissat suunerinik nassaarniassasut aammalu ataatsimeersuartoqassapat ataatsimeersuarnissap sunik imaqarnissaanik erseqqissaassasut.

Tassa imaappoq, assersuutigalugu nunani pineqartuni naalakkersuisut misissuisimanerpassuit maannakkut naammassineqareersimasut qimerloorsinnaavaat, soorlu Issittumi Siunnersuisoqatigiit allalluunniit ataanni misissuisitsisimanerit. Tassani assersuutigalugu taaneqarsinnaasut ilagaat suliniut annertoq *SWIPA – Snow, Water, Ice and Permafrost in the Arctic* (2011), aalajangersimasumik silap pissusiata allanngorneranut tunngasunik imaqartoq kiisalu suliniut ingerlanneqartussa q *AACA – Adaptation Actions for a Changing Arctic*, Issittumi ilisimasanik pioreersunik katersinissamik siunnerfeqartoq.

Issittumi Siunnersuisoqatigiit ministeriinik ataatsimiisitsinermi siorna maani Nuummi pisumi Issittumi MEGAtrendsit pillugit nassuiaat, Danmarkip/Kalaallit Nunaata suliarineqarnerani aquttuuffigisaat Nordisk Ministerráðimillu saqqummersinneqartoq saqqummiunneqarpoq.

Allanngoriartortussatut pingaarnertut taakkartorneqartut qulingiluat tikkuarneqartut ilagaat “Mingutsitsiuaruarneq maannakkullu silap pissusiata allanngoriartornera Issittumi pinngortitamut avatangiisinullu annertuumik sunniuteqartussaavoq.”

Naalackersuisut paasinninnerat naapertorlugu paasissutissanik erseqqissunik politikikkut erseqqissumik iliuuseqarnissatsinni oqallisigisinnaasagut pisariaqartinneqarput – soorlu assersuutigalugu silap pissusiata allanngornerata pisuussutitsinnut uumassusilinnut kingunerisassai. Tassani ataatsimeersuarneq Nunat Avannarliit Killiit naalackersuisuisa qaninnerusumik pisariaqartumillu suleqatigiinnissaannik aallarniutaasinnaavoq.